

# P.G. du Plessis

[Suid-Afrika](#) is geseën met talle besondere mense wat **vele hoede dra** en nie net op een terrein **uitblink** nie. So 'n mens was **P.G. du Plessis** ook – dosent, navorser, joernalis, koerantredakteur, **humoris**, aanbieder van 'n geselsprogram op televisie, vervaardiger van rolprente en TV-programme en **les bes** – uitblinkerskrywer wat talle toekennings vir sy skryfwerk ontvang het.



## Die jong P.G.

Pieter Georg du Plessis is op 14 Julie 1934 in die dorp Boshof in die [Vrystaat](#) gebore. Hy het sy matriek aan die Hoër Volksskool in Heidelberg ([Gauteng](#)) geskryf. <sup>1</sup>

Hy was baie **gesteld op** die regte spelling van sy tweede naam, Georg, sonder 'n e aan die einde! <sup>2</sup>

Hy het in sy jong dae by die skoolhoof se dogter gekuier en later met die **einste** dogter getrou – haar naam was Marie en hulle was getroud tot en met P.G. se dood. Haar pa was skoolhoof by die Hoërskool Fakkell in [Johannesburg](#) waar P.G. ook skoolgehou het. P.G. vertel van die eerste dag toe hy op die plaas by Marie gaan kuier het. Haar pa het hom gevra om 'n akkerboom te gaan plant, sommer met sy eerste kuier daar! P.G. en Marie is getroud en het twee kinders gehad – Marita en Fritz.

Daardie boom was 'n reuseboom toe P.G. in 2014 die storie vertel het. Hy het later die plaas by sy skoonpa gekoop. <sup>3</sup>

Hoewel hy algemeen as P.G. bekendgestaan het, het hy eintlik verkies om Pieter genoem te word. <sup>4</sup>



# Studies en 'n veelsydige loopbaan

Sy BA-graad het hy in 1955 aan die Universiteit van Pretoria (UP) behaal met Afrikaans-Nederlands en geskiedenis as hoofvakke. <sup>1</sup>

In 1957 het hy ook 'n onderwysdiploma aan die Pretoriase Onderwyskollege behaal en hy was vir 'n tyd lank onderwyser aan die Hoërskool Fakkell in Johannesburg. <sup>5</sup>

Hy het sy BAHons in 1960 aan die Universiteit van die Witwatersrand voltooi <sup>6</sup> en in 1966 het hy sy doktorsgraad onder leiding van [N.P. van Wyk Louw](#) behaal met die onderwerp "*Die verwysing in die literatuur*". <sup>1</sup>

Hy was 'n **direkteur** by die Raad vir Geesteswetenskaplike Navorsing (RGN), op die redaksie van die tydskrif *Standpunte*, assistentredakteur van die daaglikse koerant *Die Transvaler* en **redakteur** van die koerant *Hoofstad*. <sup>1</sup>

P.G. het as televisiepersoonlikheid verder bekend geword in die land met programme soos *Spies en Plessie*, *Maak 'n las* en *P.G. gesels met*. <sup>6</sup>



## Kyk na dié indrukwekkende lys van sy skryfwerk

### Publikasie oor literêre kritiek

1968 *Die verwysing in die literatuur*

### Toneelopvoerings

1969 *Die nag van Legio*

1971 *Siener in die suburbs*

1973 *Plaston: DNS-kind*

1977 *'n Seder val in Waterkloof*

1985 **Vereeniging, vereniging** <sup>6</sup>

1999 *Inkleurboek vir twee*

2006 **Bedevaart** vir drie aktrises

2004 *Nagkantoor*

2007 *Sophia Mentz* **beredder** haar **boedel** <sup>4</sup>



### **Prosa - kort stories**

1980 **Koöperasie**-stories op Donderdag

1983 *Hier sit die manne...*

1985 *Nog koöperasie-stories*



1991 *Koöperasie-stories: die omnibus*

1997 *Tussen die riewe*

1998 *Tweehonderd stories*

2006 *120+ somerstories*

2009 **Kortetjies en 'n lange**



### **Prosa - sketse**

1987 *Het olifante elmboë?*

1993 *Neklis*



## **Prosa - novelles**

1998 *The Married Man's Guide to Adultery: A Study of Adulterations*

2008 *Fees van die ongenooïdes*



P.G. en Sandra Prinsloo

## **Vertalings**

*Die nag van Legio* (1969) vertaal na Engels - *My name is Legion* <sup>1</sup>



## **TV-reekse en -dramas**

*Anderkant Sesriem* - die storie van 'n jong man se ondervinding in die Namibwoestyn

*'n Rand 'n droom*

*TJ7*

*Maplotters*

*Andries Plak*

*Dryfsand*

*Feast of The Uninvited* ('n verwerkte vertaling van sy boek *Fees van die ongenooïdes*).

*Mattewis en Meraai* (Mikro se stories verwerk in hierdie hoogs suksesvolle en

gewilde TV-reeks)

## ***Pandjieswinkelstories*** <sup>7</sup>



### **Rolprente**

*Nag van die 19de*

*Liewe hemel, Genis!*

*Weerskant die nag*

*The Devil And The Song* <sup>7</sup>

P.G. het die hart van die platteland en mense op die platteland verstaan. Daarom was sy stories en reekse wat in die platteland afgespeel het, uiters gewild onder lesers en kykers. Hierdie boeke en skryfwerk was onder meer *Koöperasiestories*, *Mattewis en Meraai* en *Pandjieswinkelstories*. <sup>6</sup>



## **P.G. vertel self oor sy lewe en skryfwerk**

Hy vertel dat hy die toneelstuk *Siener in die suburbs* op verskillende lughawens geskryf het. Hy was op 'n toer vir die RGN en hy het altesaam 27 vlugte tydens hierdie toer gehad! Hy het 'n ou bandopnemertjie by hom gehad en het die storie daarop opgeneem. <sup>8</sup>

Hy sê die volgende oor sy skryfwerk: "Jou hartseer skuif oor na jou karakters toe, die snaaksighede skuif oor na jou karakters toe. Al my hartseer is in *Fees van die Ongenooides* ingeskryf. <sup>3</sup>



P.G. du Plessis en en sy vrou, Marie, op hul plaas - 20 Junie 2013

Hy sê ook die: "Dit was nog nooit vir my maklik om te skryf nie. Die oomblik as dit

maklik raak, dan moet jy weet jy is in die moeilikheid.”<sup>2</sup>

Op die vraag oor of hy *Fees van die ongenooies* as sy beste werk beskou, antwoord hy: “Niemand weet hoe die langtermynoordeel gaan lyk nie. Maar ek is nie skaam vir daardie boek nie.”<sup>9</sup>

P.G. was na aan sy ouers. Toe sy pa en ma nie meer alleen in hul huis in die dorpie Cornelia, in die noordoostelike deel van die Vrystaat, kon bly nie en na P.G. se suster op die plaas moes verhuis, het sy vir hom gevra watter van sy [boeke](#) sy vir hom plaas toe moet vat. Toe antwoord hy: “Vat net vir my Boet se boeke”.<sup>3</sup>

Oor sy vrou Marie het P.G. telkens in onderhoude gesê dat sy die beste vrou in die wêreld vir hom was. Toe hy haar gevra het of sy kans sien daarvoor om saam met hom arm te wees as hy besluit om by sy werk te bedank om voltyds te skryf, was haar antwoord dat sy nie op 70 sal wil luister na sy verwyte oor alles wat hy toe nie geskryf het nie! Volgens P.G. het Marie verstaan hoe 'n skrywer se kop werk.<sup>9</sup>



P.G. en Hans du Plessis

## Toekennings

P.G. se skrywersloopbaan is gekenmerk deur talle pryse en toekennings. Hierdie is enkele daarvan:

- W.A. Hofmeyr-prys (1970) – *Die nag van Legio*
- CNA-prys (1971) – *Siener in die suburbs*
- [Hertzog-prys](#) vir Drama (1972) – *Die nag van Legioen Siener in die suburbs*
- WA Hofmeyr-prys (1973) – *Siener in die suburbs*<sup>1</sup>
- [SAUK](#)-prys vir Afrikaanse TV-drama – *'n Rand 'n droom* (1978)<sup>7</sup>
- [FAK](#)-prys vir Fiksie (1988) – *Het olifante elmboë?*
- Insig Afrikaans Onbeperk Pioniersprys (2002)
- ATKV Televisie-prys vir die Beste Teks (2007) – Vir die TV-reeks *Dryfsand*
- In 2011 is P.G. deur die Innibos Kunstefees vereer vir sy skrywersbydrae tot die Afrikaanse kultuurskat. In daardie jaar is sy [drama](#) *'n Seder val in*

*Waterkloof* ook by die fees opgevoer. <sup>9</sup>

- Helgaard Steyn-prys: *Fees van die ongenooïdes* (2012) <sup>1</sup>



P.G. en Alexa Strachan

## 'n Groot skrywer se woorde droog op

P.G. is op 7 Junie 2017 oorlede toe hy 82 was. Hy het tot met sy dood saam met sy vrou Marie op hulle plaas, Sémoèr, in die omgewing van Rysmierbult, in die distrik Ventersdorp (Noordwes) gewoon.

Die skrywer Chris Barnard het vir P.G. **raak beskryf** toe hy in 2011 die volgende oor hom gesê het:

“Hy is vinniger met die mond as Eitemal, hy is aardser as [Opperman](#), hy is so **gevat** soos Kaspaas, hy is **slimmer as die houtjie van die galg**. Hy is 'n méns in die volste sin van die woord. En hy leef die lewe.” <sup>4</sup>



P.G. en Chris Barnard tydens Du Plessis se 80ste verjaardag

## Woordbank

<b>bedevaart</b>	Geestelike reis.
<b>beredder</b>	Om 'n boedel af te handel.
<b>boedel</b>	Dit is die versamelnaam vir al die besittings en geld wat 'n persoon met sy sterfte besit het.
<b>direkteur</b>	Persoon wat bestuur of beheer uitoefen, veral een van 'n groep persone (die direksie) wat die sake van 'n bedryf/maatskappy bestuur.
<b>DNS</b>	Deoksiribonukleïensuur; die stof in die selle van die liggaam wat elke individu se unieke genetiese inligting bevat.

<b>einste</b>	Dieselfde.
<b>gesteld op</b>	Om iets presies op die regte manier gedoen te wil hê.
<b>gevat</b>	Skerpsinnig, snel van begrip.
<b>humoris</b>	Persoon wat 'n goeie aanvoeling vir humor het.
<b>koöperasie</b>	'n Koöperatiewe/samewerkende onderneming.
<b>kortetjies en 'n lange</b>	Hier verwys die titel van die boek na die plaaslyne van jare gelede - verskeie mense het dieselfde telefoonlyn gedeel en die luitone was 'n kombinasie van kort en lang luie, elke nommer het dus sy eie luitoon gehad.
<b>les bes</b>	Laaste, maar nie die minste nie.
<b>novelles</b>	Kort prosaverhale wat langer is as 'n kortverhaal, maar korter as 'n <a href="#">roman</a> .
<b>omnibus</b>	Lywige (groot) boek wat verskillende boekdele van 'n skrywer/oor 'n onderwerp bevat.
<b>pandjieswinkel</b>	Winkel waar jy 'n artikel kan gaan "verpand" wanneer jy geld nodig het. Jy kry dan 'n sekere tyd om die artikel weer te gaan terugkoop sodra jy geld het om dit te doen, anders word dit verkoop.
<b>prosa</b>	Geskrewe taalgebruik, veral as letterkundige genre.
<b>raak beskryf</b>	Baie goed/presies beskryf.
<b>redakteur</b>	Iemand wat rigting gee en toesig hou oor die beleid van 'n publikasie.
<b>riewe</b>	Delwerswoord vir uitgestrekte rotsbanke of riwwe waar delwers na diamante soek.
<b>sketse</b>	Kort stukkies prosa wat nie 'n verhaal is nie, maar eerder 'n beskrywing.



<b>slimmer as die houtjie van die galg</b>	Baie slim, maar met 'n slegte doel in gedagte; baie geslepe, slinks.
<b>uitblink</b>	Om besonder goed te presteer.
<b>veelsydige</b>	Iemand wat baie (verskillende) dinge goed kan doen.
<b>vele hoede dra</b>	Om meer as een ding of werk gelyktydig te kan doen.
<b>Vereeniging</b>	'n Dorp in die Vrystaat.
<b>vereniging</b>	Versoening, vredemaking.

## Lees hier

- [Hier kan jy sien hoe veelsydig P.G. was en ook meer verstaan oor die besondere mens wat hy was. Hierin is ook heelwat inligting oor sy skryfwerk.](#)

## Foto's oor P.G. se lewe

- [Hier kan jy sien hoe P.G. se studeerkamer op hulle plaas gelyk het.](#)

## Video's oor die veelsydige P.G.

[Kyk hier vir meer inligting oor \*Die Nag van Legio\*](#)

P.G. gesels oor hoe karakters hom raak

*Siener in die suburbs* (1973) - die volledige rolprent

*Siener in die suburbs* (1973) - kort uittreksel

P.G. gesels oor *Siener in die suburbs*

**Hier kan jy kyk na 'n episode van die program *Spies en Plessie* waarvan P.G. een van die aanbieders was**

**Lokprent van die TV-reeks *Koöperasiestories***

***Koöperasiestories* - Kyk na 'n episode uit hierdie gewilde reeks. Die drie karakters wat elke dag op die stoep van die kafee gesit het om die lief en leed van die mense van die dorp te bespreek, was Mietie, Veldsman en Genis.**

**Luister hoe PG 'n gedeelte uit *Fees van die ongenooies* voorlees**

**P.G. gesels in 2013 oor sy Fiësta-toekenning**

**Coenie de Villiers gesels met P.G. du Plessis**

**Kunstenaars gesels oor P.G. ná afloop van sy begrafnisdiens**